

PABOJA ETEHUE'YO PINIPO CUIÑAJJI YASIJJE FILIPENSES

**Pabohua Shomajo ejeanobia aniya esohui tehue cani
Jesosaja epeeji cuana Pinipo cuiñajjijo ba'e yasijje**

1 ¹ Ecuanaaya bajjani Pabo, Timoteo pea'ai. Ecuanaaya Jesosa Quitoja echacojji cuana ojaya yajjijo. Ecuanaaya esohui tehueña ojjaña miqiana huasijje, Eyacuiñajjija epeeji cuana Pinipo cuiñajjijo ba'e yasijje, Eyacuiñajjija esohui huohuijji cuana huasijje, o pejjeje ca'ajji yasijje pea'ai tehueña ecuaaya. ² Eyacuiñajji ecuanaja Chii ai. Jesosa Quito ecuanaja Emeshi Mese nei. Ohuaya miqianaya cajaanuana cahua quea pame nee. Mimishi cuana cuijea'yo majje quea bei capo mee ca'yahua pea'ai.

Pabo Eyacuiñajji nijje mimiani Jesosa Quitoja epeejijo

³ Miqianajo jjashahuabaqui'yo majje ecuanaja Eyacuiñajji bihuia tiitiaña. ⁴⁻⁵ Yahuaajo Jesosa Quitoja esohui shajja'ajja jehuaajo miqianaaya eya esohui huohui meesahua'yonaje, jjeja nei pea'ai. Jamajjeja eya Eyacuiñajji nijje miqianajo mimi tiitianijo quea bihui nee poani. ⁶ Ecuea eba e'e jojo nei Eyacuiñajjija miqianaya ojaya esohui jama ba'e meesahua coo ca'ya poa yahuaajo. Jesosa Quitoja epeeji quea ca'a pishana po mee ca'yonaje. Jjeja quea ca'a nee pishana po mee ca'yani. Quijje ca ca Jesosa Quito poe o'yajo ohuaya miqianaya quea ca'a nee nee ba'e tiitii mee caj'e yo eyajo onijje. ⁷ Eya miqianajo jjashahuaba tiitiquiani miqiana quea jea nee neejojo. Jamaya quea pame. E'e de, eyaya Jesosa Quitoja esohui janobajjima nei huohuiañajo, miquiaaya eya huohui meesahuanaje. E'e, dejja cuanaja eya iña jjimahuaajo, jeanobiajea cajo pea'ai, miqianaaya aquiana eba'e meesahuajji huoojeanaje e que. ⁸ Jesosa Quitohua miqianaya quea jea nee acani, jamaya eyaya miqianaya aña. Jamajjeja miqianaya eyaya baqui sa aña, de. Eyacuiñajjija eba eya e'e jojo nei mimiani.

⁹Eya mimiani Eyacuiñajji nijje miqúanajo jama ba'a: —Eyacuiñajji, Jesosa Quitoja epeeji cuaa pea epeeji cuana quea jea pishana acani. ¡Oya cuana pea cuana quea jea nee nee amecue, miyaya! ¡Quea huiso mijo ba meesahuacue pea'ai! ¡Quea jjashahuabaqui ja'a nee po meecue pea'ai quea pame nee eba'ejji, mimishi'ama! ¹⁰Jamajjeya Quitohua poe o'oya majje oya cuana etecueajji pojjeama. ¹¹E'e Eyacuiñajji, Jesosa Quito onijje ba'yanijo, ohuaya ojaya epeeji cuana quea pame nee ba'e meesahua cani mijo. Jesusaja epeeji cuaa quea pame nee acanijo, dejja cuaa miya bihuia caje'yo. Ojjaña ba caje miya, Eyacuiñajji ca ca oe quea ca'a nee nee, quea pame nee nee pea'ai poani —jamaya eya, Pabo mimiani Eyacuiñajji nijje miqúanajo, Pinipo meshijo ba'ejo.

Jesosa Quito ecue yami dojjojo nequi

¹²Ecuea epeeji cuana, ¡bacue jiquio esohui! Dejja cuaa eya iña majje quea huesha dojo canaje jeanobiaa. Quea camaja ejo poanaje. Jamatii, pea meshi cuana huasijje pea dejja quea huiso cuana huasijje Jesosa Quitoja esohui huohui'yonaje eyaya. Jamaya quea pame nee. ¹³E'e, eya jiquiacua ye canaje cuaa emeshi meseja ejjaquecuaquijji quea huiso huasijje, pea cuana emeshi meseja equi quea quemajo ba'e yasijje. Onaaya ba canaje eya eme' jeyo'yo nequi Jesosa Quitoja esohui huohuijijjojo onaja jeyo'yo. ¹⁴Eya jiquiojo nequianijo, beshahua nei ojjaña Jesosa Quitoja epeeji cuana onijje jjapee neineiquiani e'e jojo nei. Jjeya ca ca onaaya janobajjima nei Eyacuiñajjija esohui huohui cani mete'ama.

¹⁵Jesosa Quitoja epeeji cuaa, oe pojji cuaa Jesusaja esohui huohui cani ejo quea quene poaniya jjejojo. Jjamimicuiajea nobiajeaqui sa poani pea'ai. Beca cuana ca, cho. Jesosa Quitojo mimiani quea bihui nee, quea bei pea'ai. ¹⁶⁻¹⁷Ohuaya Jesosa Quito, eya pea'ai quea jea nee acanijo huohui cani. Onajaya eba Eyacuiñajjiya eya huoojea ca'yonaje Jesosa Quitoja esohui huohuiya. Janobajjima nei huohuiañajo, pea cuaa ba caje Jesosa Quitoja esohui e'e nei. Pea cuaa enijje quea bei pojjeamaa, Jesosa Quitoja esohui huohui cani quea tecue, emaimajji jayojja. Ma dejja cuaaya aje oe pea cuana eya pajea mee'yo sa acani, onijje jjapeequi mee'yo sa acani. Eya ejeyo'yo nequijo quea camaja pishana. Ohuaya eya quea camaja nee nee po mee sa acani. ¹⁸E'e de, beca dejja cuaa quea tecue nee huohui cani. Pea cuaa quea bei huohui cani. ¿Apiojji shai Jesosa Quitojo huohui cani? Jamatii, Jesosa Quitojo huohui canijo, eya quea bihui nee nee.

¹⁹E'e, miqúanaya ejo mimiani Eyacuiñajji nijje; Jesosa Quitohua, Edojjoshahua Pameya pea'ai eya quea ca'a po mee cani quea pame nee. Jamajjeya quijje eya quea pame nee ba'eje'yo. Jamaya ecuea eba. Jamajjeya eya quea bihui nee po tiitiije'yo.

²⁰Eya jjashahuaba tiitiiquiani Jesosa Quitojo echacojji. Jesosa Quitojo chaco sa neinei poani quea pame nee nee. Jamajjeya eya bicho'ama ecuea eba'ejji.

E'e, jjeyahua nei, quijje pea'ai eya eshe nequi ba'e sa poani Quito nijje mete'ama nei. Eshe nequije pojja'a; quecua caje'yo cuaa pojja'a. Jamatii. Eya quea pame, mete'ama ba'yanijo, pea cuaa Quito bihuia caje'yo. ²¹Eya jjashahuabaquiani jama ba'a: —Eya eshe nequianijo, Jesosa Quito ecue eyamijo nequi. Quijje, mano'yo majje eya onijje ba'eje'yo eyajo quea pame nee nee. Jiquiojo ca ca quea pame pishana eya ba'yani. ²²E'e de, jiquio meshijo ba'yanijo eyaya Jesosa Quitoja esohui huohuije'yo pea cuana huasijje. ¿Achejo shai ba'e sa poani eya jjeya? Jiquiojo pojja'a. Eyajo Jesosa Quito nijje pojja'a. Cua'a de. ²³Jjeyahua nei jiquio meshijo ba'e sa neinei poani eya. ¿Achejo shai? Eyajo Jesosa Quito nijje eba'eji ca ca oe e'e jojo nei ecuea quea pame nee nee. ²⁴Jamatii, eya jiquio meshijo ba'e tiitianijo, quea pame nee poaje miqianaya. ²⁵E'e nei jamaya ecuea ejjashahuabaqui'yojji. E'e, eya ba'eje'yo jiquio meshijo. Jamaya ecuea eba. Eya miqiana nijje nequije Jesosa Quitoja epeeji quea ca'a nee epo meesahuajji, quea bihui nee Jesosa Quito ba meesahuajji pea'ai. Jamaya e'e jojo nei. ²⁶Jamajjeya miqianaaya Jesosa Quito bihuiaje'yo e'e jojo nei enijje quijje e miqiana que poquiyajo.

²⁷E'e, eya epoquijji pojjeama pojja'a miqiana baa; baquije pojja'a mi ba'ajjaa. ¡Jamatii! Esohui quea pame nee Jesosa Quitojo miqianajaya eba. Jamajjeya ¡jamaya ba'ecue quea ja'a nee! Jamajjeya eyaya shajja'ajjaje miqianaya Jesosa Quitoja epeeji cuana ojee quea ca'a nee ba'yani. Ojee janobajjima nei huohuiaña Eyacuiñajjija esohui Jesosa Quitojo pea'ai. ²⁸Dejja mimishi cuaa miqianaya napa cajo, ja'a oe quea mete pojji! Chojja, miya ca ca mete'ama tiitii anianijo, ma dejja mimishi cuaa ba caje jama ba'a: Quijje Eyacuiñajjiya oya cuana napa tiitii caje'yo cuaquijo. Oya cuana ba mee caje pea'ai miqianaya ca ca ba'e tiitii mee caje'yo eyajo, ohuaya. ²⁹E'e, Eyacuiñajjiya miqianaya jjapeequi meesahua cani Jesosa Quito nijje. Pea cuana, cho. Jamaya pea'ai ba'a: Jesosa Quito nijje ba'yanijo, pea cuaa miqianaya napa caje. Jamaya Eyacuiñajjija eba. E'e, ohuaya miqianaya nahue caje peaa napa cajo. ¡Jamatii quea bihui pocue! ³⁰¡Jjeya miqianaya, e jayojjaya janobajjima nei eshahuaja epeeji cuana jeabichajeacue! E'e, jjeyahua nei eyaya jamaya Jesosa Quitojo huohuiaña tii. Jamaya miquea eba.

Jesosa Quito quea bei, quea ca'a nee nee pea'ai

2 ¹¿A'a Jesosa Quitohua miqianaya quea bihui nee po mee cani? Ohuaya quea jea nee nee acanijo, ¿a'a miqianaaya pea cuana quea jea nee aña pea'ai? ¿A'a Edojjoshahua Pame nijje jjapeequiani miqianaya? ¿A'a pea dejja cuana nijje miqianaya quea bei? ¿A'a pea dejja ba'e meesahuaña pea'ai? ¡E'e jojo nei jamaya oe pocue! ²Jamajjeya ¡miqianaaya iña oe che quea bihui nee nee po meecue, de! Ojjaña oe ojee jjashahuabaquicue Jesosa Quitoja ejjashahuabaquijji jayojjaya jama ba'a: ¡Ojee jjapeequicue quea bei nee! ¡Pea cuana quea jea nee acue miqianaaya! E'e, ¡ojee Jesosa Quitojo jjashahuabaquicue! ³¡A'a mimijajjiji pea quea bicho po meeji! ¡A'a jamaya pojji miqianaya! Chojja. ¡Pea cuana nijje quea bei nee nee pocue! Jjashahuabaquicue jama ba'a: —Eya quea pame pishana; pea cuana quea pame nee.

⁴Miquianaya quea pame nee ba'e sa poani. Jamaya quea pame.
 ¡Pea cuana a'a pajea'yojji! ¡Ba'e meesahuacue quea pame nee pea'ai!
⁵¡Jesosa Quitoja ejjashahuabaquijji jayojja jama jjashahuaba tiitiuicue!
⁶Jama ba'a: Oya, Jesosa Quito Eyacuiñajji jayojjaya tii tii poa. Jamatii
 Eyacuiñajji jayojja pojjeama po'yo majje meshijo nequi yeno'ama Jesosa
 Quito poa. ⁷E'e, Jesosa Quito nequi tiitii ajja poa eyajo, Eyacuiñajji
 jayojjaya jama pojjeama poa. Oya Eyacuiñajjija yajjijo ojaya echacojji
 meshi yasijje poe sa poa. Jamajjeya eseya esho'i cuaya poa jama Jesosa
 Quito cuaya pohua, yamijji. ⁸Oya ba'e'yonaje dejja cuana jayojja.
 Eyacuiñajjiya oya huoojea canaje dejja cuana jayojja mano'yome epojji.
 Jamajjeya oya dejja cuana jayojja jama quecua mee'yome acanaje
 cuaa. E'e nei acui ecueata'apeejo Jesosa Quito mano'yonaje dejja
 mimishi jayojja. ⁹Jamajjeya Eyacuiñajjiya oya shequi mee ca o'oyanaje.
 Yahuasijje dojosohuaqui ca'yonaje. Jesosa Quito oe nei ojjañaja Emeshi
 Mese nei po mee ca'yonaje. ¹⁰Jamajjeya quijje ojjaña eyajo ba'eya, dejja
 eshe cuana pea'aiya, ojjaña yahuajo emano'yo pea'aiya, ojjaña eshahua
 cuana pea'aiya Jesosa Quito bihuia caje'yo ecui'oshajjajo nequiya.
¹¹Ojjaña cojja ba majje ojjaña huohui caje'yo Jesosa Quito e'e jojo nei
 Emeshi Mese oe nei quea ca'a nee nee po tiitiani. Jamajojya Eyacuiñajji,
 Jesosa Quitoja Chii bihuia caje'yo, ojjaña nei neiya. Jamaya poaje'yo.

Jesosa Quitoja epeeji ejijiji jayojja

¹²Jamajjeya ecuea epeeji e'e jojo nei cuana, ¡shajja'ajjacue ecuea
 esohui! Yahuajo miquiana nijje nequiahua eya miquiaaya ecuea
 esohui shajja'ajjanaje. Jjeya eya quea huesha nee nequi. Miquiana
 nijje enequijji pojjeama. ¡Jamatii jiquio ecua eyaya huohuiaña jama
 atiitiicue! ¡A'a pajea'yojji! Eyacuiñajjiya miquianajaya mimishi cuijea
 ca'yonaje, jamajjeya ¡shajja'ajja tiitiicue oe ojaya esohui! ¡Miquianaya
 oe jjashajja'ajjaquicue quea bei! ¹³E'e de, Eyacuiñajjiya miquianaya ba'e
 meesahua cani ojaya ejjashahuabaquijji jayojja. Jamajjeya miquianaya
 ojaya esohui jama ba'e sa poani. Ohuaya miquianaya jjashahuabaqui
 meesahua cani quea bihui nee ojaya ejjashahuabaquijji jayojja.

¹⁴Eyacuiñajjijo chacochoani ¡a'a panajajijji! ¡A'a jja oe jjamimicuijjea
 nobiajeaquijji! ¹⁵Jamajjeya miquianaya pea cuanaja etecueajji pojjeama.
 Eyacuiñajjija ebacua cuana quea pame nee miquianaya poaje. Eshahuaja
 epeeji cuana ca ca quea tai nee nee, siajjepojji nee nee quea chipi
 nee nequi. E'e nei miquiana quea boejea ba'yanijo, majameta beca
 jijinequi jama poaje. Jamajjeya ojjaña dejjaa quea mimishi cuaa ba caje
 miquianaya Jesosa Quitoja epeeji e'e jojo nei. ¹⁶E'e, miquiaaya ona
 huasijje Eyacuiñajjija esohui huohuiaña Jesosa jayojja eba'ejji, yahuajo
 jama pojjeama eba'ejji huohuiaña. Miquianaya jamaya poanijo, eya
 quea bihui nee poaje'yo Jesosa Quito poe o'oyajo. Ma pojajajo eyaya

baje ecuea echaco, ecuea esohui pea'ai miqianajaya pajea'yo jjima pojja'a. ¹⁷Jamaya poaje pea'ai pojja'a ba'a: Yahujajo nei nei Eyacuiñajji epeeji cuaa aquiana dahuajea caninaje Eyacuiñajji bihuiajji. Aquiana Eyacuiñajji quea bihui nee epo meejji jayojja jama jjeya e'e pojja'a eya manoj'e'yo miqianaya Jesosa Quito nijje ejjapeequi meesahuaji. Jamajjeya Eyacuiñajji quea bihui nee poaje miqianajo. E'e de, eya pea'ai miqianajo quea bihui nee poani. ¹⁸Jamajjeya quea bihui nee pocue enijje!

Pabohua Timoteojo, Epamonitojo pea'ai huohui cani

¹⁹Eyaya Timoteo huoojea sa añã miqiana que. E'e pojja'a Jesosaa, esejaya Emeshi Mese neiya eya Timoteo huoojea mee caje jjeyahua nei. Timoteohua miqiana ba majje eya huohui cahuaje e quea bihui pojji. ²⁰E'e, ecuea ejjashahuabaquijji quea pame nee jayojja jama Timoteo oe nei jjashahuabaquiani miqianajo. Ohuaya miqianaya quea pame nee Jesosa Quito nijje ba'e meesahua sa neinei acani. ²¹Pea dejja cuana ca ca oja aquianajo jjashahuaba tiitiqiani. Jesosa Quitoja echacojjiyo jjashahuabaqui sa po ajja. ²²Timoteohua Eyacuiñajji esohui quea pame nee huohui canaje. Jamajjeya miqianajaya eba oya quea pame nee. Esho'yahua oja chii nijje chaco ca poa jayojja jama acanaje Timoteohua enijje; esohui Jesosa Quitoja huohui canaje, Timoteohua. ²³Jamajjeya jjeyahua nei eyaya oya huoojea sa añã miqiana que. ¿Yajja shai dejja cuaa eya acaje'yo jiquiojo ba'ecaa? Maya shajja'ajja majje eyaya Timoteo huoojeacuajije miqiana que. ²⁴Eya jjashahuabaquiani jama ba'a: Esejaya Emeshi Mese neiya eya poqui meesahua caje miqiana que, Pinipojo ba'e yasijje quijje pishana pojja'a.

²⁵Eya jjeya miqianajo jjashahuabaquiani. Jamajjeya eyaya Epamonito huoojeaje miqiana que. Oya ecue chahua jayojja Jesosa Quito nijje jjapeequianijojo. Ohuaya Jesosa Quitoja esohui eya huohui meesahua canaje. Yahujajo miqianaya oya huoojeanje e que aquiana quiaa, e jaahuanaa pea'ai. ²⁶Oya miqianaya ba o'oya sa poani, de. Miqianaaya shajja'ajjanaje oya quea mano nee nee poanaje. Miqianaya ojo quea yeno poso, oya quea yeno poanaje. ²⁷E'e, oya quea mano poanaje. Beshahua nei mano'yonaje. Eyacuiñajjiya oya huaquia meesahua ca'yonaje, de. O emano'yo jojjemo eya quea yeno nee nee pome. Eyacuiñajji e quea yeno nee nee nequi mee sa po ajja. ²⁸Jamajjeya jjeya eya o huoojea sa neinei poani miqiana que. O ba o'oya majje quea bihui nee miqianaya poaje. Miqianaya ojo quea bihui nee poanijo, eya pea'ai quea bihui nee poaje. ²⁹Jamajjeya Jesosa Quito nijje jjapeequianijo Epamonito miqiana que poe o'oyajo, ¡onijje jama mimicue ba'a: —¡Mi poe'yajo eya quea bihui nee! —acue!

Quea pame nee poani Epamonito. Pea oya jayojja poanijo pea'ai ¡shajja'ajjacue! ³⁰Oya Jesosa Quitojo chacochoanijo beshahua nei mano'yonaje. E'e, quea camaja nee nee, de. Jamatii ohuaya chaco tiitii canaje mete'ama nei. Miquianaaya e que poe ajjaa jjejojo Epamonito huoojeanaje e chacosahuua.

Esohui e'e jojo nei quea pame nee

3 ¹Ecuea epeeji nei cuana, jjeya eyaya pea esohui tehueje miquiana que. ¡Emeshi Mese neijo quea bihui nee pocue, miquianaya! Yahuajo eyaya esohui miquiana que huohuinaje. Jjeya oyaya tehue o'oyaña quea bihui nee miquiana Jesosa Quitoja epeeji quea ca'a nee nee epo meeji. Jamajjea pea cuaa miquianaya edasiajji pojjeama. ²Jodio esohui huohuijji nisho cuana ¡a'a shajja'ajjaji! Oya edasiajji cuana, ñaehua quea mase jja'ijjiaquiani jama. Jesosa Quito nije jjapeequi ajja. Miquea cuiishasha jee biso nei jehusejjajea mee sa acani huohuime acani ca ohua. ³Cuiishasha biso nei jehusejjajea mee majje maya dejja cuana jjapee nishoquiani Eyacuiñajji nije. Esey a ca ca Eyacuiñajjija epeeji e'e jojo nei. E'e, Edojjoshahua Pameya eseya Eyacuiñajji bihuia meesahua cani. Jamajjea eseya quea bihui nee nee jjapeequiani Jesosa Quito nije. Ohuaya, Jesosa Quitohua ca ca oe eseya mimishi'ama po mee cafe'yo. ⁴Pea dejjaa aje oe Jodio etiiquianaja esohui jama amajje jjashahuaba quehuaquiani jama ba'a: —Eya Eyacuiñajjija epeeji quea pame nee.

Chojja de. Yahuajo Jodio etiiquianaja esohui jama quea huiso eyaya a'yonaje. Ma esohui quea huiso nee nee yahuajo jama amajje ¿a'a eya quea pame nee? Chojja. ⁵Yahuajo aje eyaya jama anaje ba'a: Jodio etiiquianaja esohui etehue'yo jama acanijo, eya me oeje pea beca peejjima cahuime, 8 cahuime etijjo, ecuea cuiishasha biso nei jehusejjajea ca'ya poa cuaa. Eya Isaeni dejja. Jamaya ecue chii poa. Ecuea etiiquiana Bejami bajjani. Jamajjea eya Jodio nei Bejami cuana nije. Jamajjea eya Emeo esohui mimiani. Eya Jodio etiiquianaja esohui jayojja jama poanaje pea Jodio esohui huohuijji Paniseo bajjani cuana nije. ⁶Jodio etiiquianaja esohui cuana quea jea nee nee poa ecuea. Jamajjea eyaya Jesosa Quitoja epeeji cuana janobajjima nei napanaje; etiiquianaja esohui a sa po ajjajojo napanaje. E'e, eyaya ma esohui cuana jayojja jama aneinei'yonaje yahuajo. Jamajjea Jodio dejja cuana enijje mimijaji jjima poa. ⁷Jodioja esohui quea huiso shajja'ajja majje eya jjashahuaba taiquinaje jama ba'a: —Eya quea pame nee nee ba'e —poso jjabaquinaje.

Jjeya ca ca Jesosa Quitoja esohui ya'yojji eyaya Jodioja esohui cajaa a'yonaje. ⁸E'e, eya jjashahuabaquiani jama pea'ai ba'a: Ojjaña aquiana quea pame cuana oe pojji sosejje, sosema', shabo jama cajaa ña. Jesosa Quito ca ca aquiana quea sose huiso nee nee jayojja eyaya baña. Jamajjea aje ña oe jama jjashahuabaquime poani ba'a: Jesosa Quito, ecuea Emeshi Mese nei nije jjapeequianijo eya quea pame nee nee poani.

Quea sose huiso nee nee eyaya Jesosa Quito baña. ⁹E'e, Jesosa Quitoja epeeji poanijo, eya ohuaya onijje nequi tiitii mee caje'yo; quea boejea'yo nee nequi mee caje'yo. Jodioja esohui cuana jama amajje eya quea boejea'yo pojjeama. Eya Jesosa Quito nijje e'e jojo nei jjapeequianijo, ohuaya eya quea boejea po mee ca'yani. E'e, Eyacuiñajjiya huohui cani: —Ojjaña Jesosa Quitoja epeeji cuana eyaya quea boejea'yo po mee yaña.

¹⁰E'e, yahuajo Jesosa Quito ecuea eba pishana poanaje. Jjeya eya o ba neinei'yo sa poani. Eyacuiñajji quea ca'a nee poanijo ohuaya Jesosa Quito shequi mee ca o'oyanaje. Jamajoya eya o jayojjaya caba'e mee ca'yahua. Ma ecua oya napa ca poa jama jayojjaya eya acaje'yo pea cuaa, Jesosa nijje jjapeequianijo mo cuia caje'yo cuaa pojja'a o jayojjaya. ¡Jamatii mo ca'a ca'yahua! ¹¹Jamajjeya jjeya eya jjashahuabaquiani jama ba'a: —Eyacuiñajjiya eya shequi mee caje o'oya. Jesosa Quito nijje ba'e tiitii mee caje'yo Jesosa Quito jayojjaya, quea boejea ba'eje'yo onijje tii.

Pabohua Jesosa Quitojo chaco tiitii cani

¹²Eya Jesosa Quito jayojja jama pojjeama. Oya quea pame nee nee, quea ca'a nee nee pea'ai. Eya quea ca'a pishana. Jjeya eyaya janobajjima nei chacoaña Jesosa Quitojo. Jamajjeya ohuaya eya ojaya epeeji quea ca'a po mee cani. E'e, Jesosa Quitohua eya jjeshe'yo majje onijje jjapee tiitii meequi ca'yani. ¹³Ecuea epeeji cuana, ¡shajja'ajjacue! Ecuea ejjashahuabaquijji jama ba'a: Eya Jesosa Quitoja epeeji quea ca'a nee, quea pame nee nee pojjeama. Eya ca ca jamaya poani ba'a: Eya jjashahuabaqui tiitii ajja ecuea esohuijo ma eya yahuajo anajejo. Jjeya eya jjashahuabaquiani jama ba'a: Jesosa Quitohua eya chaco meesahua caje janobajjima nei ojo. Jamaya eyaya a sa neineaña. ¹⁴Eyaya janobajjima nei chaco tiitiiña Jesosa Quitojo. Jamajjeya quijje Eyacuiñajjiya ecuea echaco sosejje sosequia caje'yo. Jamaya acaje Jesosa Quitohua eya eyahuasijje iyaa'yo majje onijje eba'e tiitii'yojji.

¹⁵Jamajjeya eseya, Jesosa Quitoja epeeji quea ca'a cuana Jesosa Quitoja ejjashahuabaquijji jayojja jama jjashahuabaquiani tii tii. E'e pojja'a miquianaya jamaya po ajja. Eyacuiñajjiya miquianaya jjashahuabaqui mee caje'yo quea ja'a nee o jayojjaya. ¹⁶E'e nei, eseyaya Eyacuiñajjiya esohui quea huiso ba huicha'a huicha'aña. Jamajjeya ¡ojaya esohui jayojja jama ejja'a tiitiiqui!

¹⁷Ojjaña ecuea epeeji cuana, ¡e jayojja ba'ecue! ¡Pea dejja cuana babacacue; ma ecua eyaya miquiana nijje nequiya anaje jamaya ca'a cahua cuaa! ¡Onaya oe jamaya atiitiihue, miquianaaya! ¹⁸Yahuajo eyaya miquianaya huohui majamajanaje pea dejja cuana quea mimishi nee nee poanijo. Jjeya quea yeno nee eyaya huohuije o'oya ma dejja cuanajo. Jesosa Quito acui ecueataapeejo mano'yonaje. Oya cuana ca ca Jesosa Quitoja esohui jayojja jama po ajjajo o quecua'yojji epo jayojja poani. ¹⁹Jamajjeya ma dejja cuana cuaqui yasijje poquije'yo. Ojaya aquiana huisojo jjashahuaba tiitiiquiani. Eyacuiñajjiyo

jjashahuabaqui sa po'yo ajja. Oya cuana oja mimishijo bicho'ama, quea bihui nee poani. E'e, jjashahuaba tiitiiquiani quea tai. ²⁰Eseya ca ca jamaya ba'e ajja; Jesosa Quito nijke eyajo ba'e tiitijeyo. Jesosa Quitohua eshahua eseja mesena pajea mee ca'yonaje. E'e de, esejaya Emeshi Mese nei Jesosa Quito poeje o'oya. O poe o'oyajji eseyaya ishoa'ajjaña quea bihui neeya. ²¹Esejaya eyami ca'a'ama. Jesosa Quitohua poe o'oya majje esejaya eyami quea ca'a nee nee panacuaji caje'yo ojaya eyami jayojja jama quea ca'a nee nee epo'yojji tii tii. Jamaya po mee caje'yo ohuaya quea ca'a nee nee poanijo. E'e, quea ca'a nee poanijo ohuaya ojjaña huoojea tiitii cani. Ojjaña aquiana cuiña cani, Jesosa Quitohua.

Pea esohui cuana eba'ejji quea pamejo

4 ¹Jamajjeya ecuea epeeji cuana, ¡jjapee tiitiicucue quea ca'a nee! Miquianaya ecuea quea jea nee. Baqui o'oya sa neinei poani. Miquianajo eya quea bihui nee. Miquianaaya quea pame nee Jesosa Quitojo añajo maya ecuea esosequia'yojji jayojja. Jamajjeya ecuea etehue'yo jayojja jama poanijo, miquianaya esejaya Emeshi Mese neijo quea ca'a ba'eje. Eyaya miquianaya quea jea nee nee añe.

²Epona cuana Emonia bajjani, Sinitique pea'ai, ¡shajja'ajjacue mo, che! Emeshi Mese nei Jesosa nijke jjapeequianijo ¡a'a jjamimicuiajea nobiajeaquijji! ³Ecuea pea epeeji nei, ¡miyaya ma epona beca quea bei ba'e meesahuacue! Ohuaya yahuajo eya Eyacuiñajji esohui huohui meesahua neinei ca'yonaje. Dejjaja Cuemete bajjaniya esohui huohui meesahua neinei ca'yonaje pea'ai. Quea huiso ecuea pea epeeji cuana esohui huohui meesahua ca'yonaje pea'ai. E'e, Eyacuiñajjiya ojaya esohui etehue'yojo eyajo oja bajjani cuana tehue ca'yonaje ona ba'e mee tiitii'yojji.

⁴Miquianaya Jesosa nijke jjapeequianijo ¡quea bihui nee po tiitiicue! ¡E'e jojo nei quea bihui nee po tiitiicue! ⁵¡Quea bei nee pocue ojjaña cuana nijke! Jamajjeya ojjaña cuaa ba caje esejaya Emeshi Mese nei poeje jjeyahua nei pojja'a. ⁶¡A'a quea mete pojji! Chojja. ¡Mimicue Eyacuiñajji nijke! ¡Aquiana sa poanijo oya oe huohucue! ¡Eyacuiñajji bihuicue pea'ai! ⁷Jamajjaya Eyacuiñajjiya miquianaya quea bei nee nee po mee caje. Quea bei nee nee miquianaya poaje Jesosa Quitojo. Ojjaña dejjaja cuana jamaya jjashahuabaqui ajja. E'e, Jesosa Quito nijke jjapeequianijo, ohuaya miquianaya quea quijijji jaji nee po mee caje. Mete'ama jjashahuabaqui meeme acani pea'ai.

⁸Epeeji cuana, jjeya pea esohui oe pojji eyaya miquianaya huohuije. ¡Esohui e'e jojo neijo jjashahuaba tiitiicucue ojjaña Eyacuiñajjiya esohui quea pame neejo pea'ai! ¡Jjashahuabaquicue pea dejjaja cuanaja eba'ejji quea pame neejo pea'ai! Ejjashahuabaquijji quea bei epo'yojjijo, quea bihui nee epo'yojji pea'aijo ¡jjashahuabaquicue! Echacojji quea pame nee neejo, Eyacuiñajjiya dejjaja cuana quea bihui nee po mee canijo pea'ai ¡jjashahuaba tiitiicucue! E'e, jamaya ojjañaja quea jea nee. ⁹Ecuea esohui shajja'ajjanaje miquianaaya. Ecuea esohui etehue'yo banaje pea'ai. ¡Jamaya miquianaya po

tiitiicue! Ecuea echaco quea pame banaje. ¡Jamaya miquianaaya atiitiicue pea'ai! Jamajjeya Eyacuiñajji minijje nequi titiije; quea bei po mee caje.

Pabo ojaya epeeji Pinipojo ba'e cuana nijje quea bihui poani

¹⁰Yahuajo nei miquianaaya aquiana eba'e meejji huoojeanje e que, sosema'. Yahuajo pishana quiojoya miquianaaya paje'yo jjima año. Jamatii aquiana huoojea jjima poa. Jjeya eya ba'e sahua o'oyaña. Jamajjeya eya quea bihui nee nee esejaya Emeshi Mese nei nijje, Jesosa Quito nijje jjapeequiani. ¹¹ ¡A'! jjashahuabaquijji eya mimiani eya aema' poanijo! Eya jjashahuabaqui tiitii ajja aquiana eba'e meejjijo. Oe pojji aquiana ecuea poanijo, jamatii. ¹²E'e, aema' poanijo, jamatii. Eya quea bei. Ecuea aquiana quea huiso yanijo, jamatii eya quea bihui. E'e pojja'a ecuea eba'ejji quea camaja poaje o'oya. E'e pojja'a camaja'ama poaje. Jamatii. Eya mimije Eyacuiñajji nijje jama ba'a: —E'e Eyacuiñajji, ecuea eba'ejji quea pame.

E'e, quea jejejo, quea shoe pea'ajo, aema' poanijo, aquianajji pojja'a poanijo jamatii eya quea bihui. ¹³Jamajjeya quea camaja poanijo jamatii eya quea bihui nee Jesosa Quitohua eya ba'e meesahua canijo. ¹⁴E'e, ecuea eba'ejji quea camaja poanijo, miquianaaya eya ba'e meesahuanaje quea jea nee. Jamaya quea pame.

¹⁵Yahuajo Eyacuiñajjija esohui quea pame miquiana huasijje, Pinipojo ba'e yasijje huohui coo majje eya Masenonia meshijo nequi poquinaje. Ma pojjaajo, quijje pea'ai miquiaaya nei eya aquiana quianaje. Jesosaja epeeji cuana pea cuiñajjijo ba'eja aquiana quia'yo jjima. Maya miquianajaya eba. ¹⁶E'e, eya Tesanonicajo chacochacoanijo eba'ejji quea camaja ecuea poanaje. Jamajjeya miquiaaya aquiana huoojea huicha'a huicha'anaje e que. ¹⁷Miquianajaya aquiana ehoojeajjijo eya jjashahuabaqui ajja poanaje. Ecuea ejjashahuabaqui'yojji ca ca jiquio jama ba'a: Miquiaaya aquiana e que quia'yonaje sosema'. Jamajjeya Eyacuiñajjiya miquianaya quea ja'a nee po mee caje. E'e, quijje pea'ai quea huiso sosequia caje'yo ohuaya ma miquiaaya anaje sosejje. ¹⁸Miquiaaya Epamonito huoojeanje e que aquiana quiaa. Jamajjeya jjeya quea huiso nee ecuea aquiana eba'ejji yani. Ba'eje eya quea pame nee. E'e, ma aquiana equia'yojji aquiana Eyacuiñajji yasijje ebihua'yojji jayojja, quea shiye nee nee jayojja, Eyacuiñajji quea bihui nee nee epo meejji. ¹⁹Esejaya Eyacuiñajjija aquiana quea pame nee, quea huiso yani, de. Jamajjeya e'e jojo nei ohuaya miquianaya ba'e meesahua caje. Jamaya poaje ohuaya miquianaya Jesosa Quito nijje jjapeequianijo.

²⁰Ojjaña Jesosaja epeeji cuana Eyacuiñajji, esejaya Chii ai eyajo cabihua tiitii cahua jjeya nei, quijje pea'ai. Jamaya capoahua.

Esohui quea bihui epo meejji

²¹Ojjaña Jesosaja epeeji cuana quea bihui nee huohui'ajjacue jama ba'a: —¿Achajja acuae quiana so'o, de? —ecuanajaya ebajji.

Jesosaja epeejji cuaa enijje nequiya miqianaya huohui'ajja cani jama ba'a: —¿Achajja acuae quiana so'o de? —onajaya ebajji.

²²Jesosaja epeejji cuana emeshi mesejo chaco canijo, ojjaña cuana jiquio tiijo pea'aiya miqianaya huohui'ajja cani jama ba'a: —¿Achajja acuae quiana so'o, de? —onajaya ebajji.

²³Esejaya Emeshi Mese nei Jesosa Quito miqianajaya eyami dojjojo nequi. ¡Ohuaya miqianaya quea pame nee cajaahuana cahua! Mahuiso ecuea esohui. Eyaya Pabohua tehuejeyonaje. Apoa.